

**PEMBERITAHUAN PERTANYAAN LISAN DEWAN RAKYAT
MESYUARAT KEDUA, PENGGAL KEDUA
PARLIMEN KEEMPAT BELAS**

PERTANYAAN : LISAN

**DARIPADA : YB DATO' SRI AZALINA OTHMAN SAID
[PENGERANG]**

TARIKH : 10 JULAI 2019

SOALAN NO. 61

Minta **PERDANA MENTERI** menyatakan apakah dasar dan polisi Kerajaan Persekutuan berkenaan dengan hak pemilikan tanah Orang Asli serta apakah usaha untuk memastikan hak tersebut dihormati oleh semua pihak seperti mana yang termaktub dalam Perlembagaan, Kanun Tanah Negara, Akta Peralihan Hak Atas Tanah dan Akta Orang Asli.

JAWAPAN : YB DATUK LIEW VUI KEONG
MENTERI DI JABATAN PERDANA MENTERI
(UNDANG-UNDANG & HAL EHWAL PARLIMEN)

Tuan Yang di-Pertua,

Untuk makluman Yang Berhormat, Jabatan Perdana Menteri (JPM) menerusi Jabatan Kemajuan Orang Asli (JAKOA) komited dalam usaha untuk membangunkan tahap sosioekonomi masyarakat Orang Asli menerusi pembangunan tanah dan pemilikan tanah secara terancang dan komprehensif. Justeru itu, Kementerian ini menerusi Jabatan Kemajuan Orang Asli (JAKOA) telah menyediakan Kertas Dasar Pembangunan dan Pemberimilikan Tanah Orang Asli (DPPTOA) yang telah dipersetujui dalam Majlis Tanah Negara (MTN) kali ke-65 pada 4 Disember 2009 yang dipengerusikan oleh YAB Timbalan Perdana Menteri.

Meskipun begitu, pada 17 Mac 2010 menerusi Mesyuarat Jemaah Menteri telah memutuskan supaya dasar berkenaan dikaji semula ekoran terdapatnya memorandum bantahan daripada Badan Bukan Kerajaan (NGO) Orang Asli. Buat masa ini, sebarang urusan kerja-kerja ukur dan permohonan pewartaan tetap dilaksanakan oleh Jabatan Kemajuan Orang Asli (JAKOA) dengan kerjasama Pihak Berkuasa Kerajaan Negeri (PBN). Ini bagi menjamin hak dan kepentingan masyarakat Orang Asli terhadap tanah tetap terpelihara. Pihak Jabatan Kemajuan Orang Asli (JAKOA) juga, telah mendaftarkan Akta 134 ke dalam senarai Akta untuk pindaan oleh pihak Kerajaan yang dipantau oleh pihak Bahagian Hal Ehwal Undang-undang, Jabatan Perdana Menteri (BHEUU, JPM) pada Januari 2019.

Pindaan ini bertujuan untuk menambahbaikkan peruntukan perundangan untuk kemajuan serta perlindungan hak masyarakat Orang Asli terhadap tanah. Antara cadangan pindaan Akta 134 adalah dengan mengambil kira hak-hak utama Orang Asli dalam *Declaration on the Rights of Indigenous Peoples* (UNDRIP), menyediakan mekanisme penyelesaian sekiranya berlaku pencabulan terhadap hak-hak tanah adat Orang Asli, perluasan pewartaan tanah Orang Asli dan kaedah pampasan berdasarkan keputusan-keputusan mahkamah yang telah diputuskan, Konsep Izin Maklum Awal Bebas Telus (IMABT) dalam melaksanakan kerja-kerja pembangunan. Selain itu Jabatan juga akan meneliti isu-isu berbangkit seperti pertindihan kawasan Hutan Simpanan Kekal (HSK) dengan kawasan penempatan Orang Asli termasuk pegiktirafan tanah adat yang dituntut oleh masyarakat Orang Asli.

Untuk makluman Yang Berhormat, pindaan Akta Orang Asli juga akan turut mengambil kira peruntukan perundangan seperti termaktub dalam Perlembagaan, Kanun Tanah Negara, Akta Pengambilan Tanah 1960 bagi memastikan hak pemilikan tanah Orang Asli dihormati oleh semua pihak dan dilindungi dalam perundangan di Malaysia.

Sekian, terima kasih.